

Месяца октября в 11-й день
Служба собору преподобных отцев Оптинских
На вечерни

На Господи, возвах: стихиры, глас 8.

Подобен: О, преславнаго чудесе:

О, преславнаго чудесе! / Днесь ликует обитель Оптинская, / память преподобных отцев празднующи, / иже духовная дарования источают обильно. / Темже, с любовию к ним возопиим: / о, теплии молитвенницы наши ко Господу, / испросите нам прощение согрешений / и, яко звезды непрелестнии, / путеводите ны к Царствию Небесному.

О, преславнаго чудесе! / Днесь ликует обитель Оптинская / прославляющи честныя мощи преподобных отцев, / иже в житии израстиша прекрасный плод благочестия / и, яко ваия благоуханныя процветше, / любовь евангельскую нам явиша. / Тех молитвами, Христе Боже, / не отвержи нас от лица Твоего / и даруй нам мир и велию милость.

О, преславнаго чудесе! / Днесь ликует обитель Оптинская / благодатию святых своих красующися, / иже души и телеса многонедужная врачуют. / Темже и мы, духовно радующесе, / Господа дивнаго во святых Своих прославляем / и, на их предстательство надеющесе, / Христа Бога нашего умоляем / даровати нам велию милость.

Слава, глас 6:

Днесь благодать Святаго Духа нас собра, / песньми священными прославити / собор преподобных отцев Оптинских, / иже вернии служителие Святыя Троицы явишася. / Сего ради, вернии, к Богу с любовию возопиим: / святыи Боже, святыи Крепкий, / святыи Безсмертныи, помилуй нас.

И ныне, Богородичен: Кто Тебе не ублажит:

Вход. Прокимен дне и чтения преподобническая.

Премудрости Соломоновы чтение (главы 5 и 6):

Праведницы во веки живут, и в Господе мзда их, / и попечение их у Вышняго. / Сего ради примут Царствие благолепия / и венец доброты от руки Господни, / зане десницею покрывает я и мышцею защитит их. / Приимет всеоружие рвение свое / и вооружит тварь в месть врагом. / Облечется в броня правды / и возложит шлем, суд нелицемерен. / Приимет щит непобедимый, преподобие, / поострит же напрасный гнев во оружие, / споборет же с ним мир на безумныя. / Пойдут праволучныя стрелы молниины / и, яко от благокругла лука облаков, на намерение полетят, / и от каменометныя ярости исполнь падут грады. / Вознегодует на них вода морская, / реки же потопят я нагло. / Спротив станет им Дух Силы / и, яко вихор, развеет их, / и опустошит всю землю беззаконие, / и злодейство превратит престолы сильных. / Слышите убо, царие, и разумеите, / навькните, судии концев земли. / Внушите, держащи множества, / и гордящиися о народех язык, / яко дана есть от Господа держава вам / и сила от Вышняго.

Премудрости Соломоновы чтение (глава 3):

Праведных души в руже Божией,/ и не прикоснется им мука./
Непщевани быша во очесех безумных умрети,/ и вменися
озлобление исход их,/ и еже от нас шествие – сокрушение,/ они
же суть в мире./ Ибо пред лицом человеческим аще и муку
приимут,/ упование их безсмертия исполнено./ И в мале наказани
бывше, великими благодетельствовани будут,/ яко Бог искуси я и
обрете их достойны Себе./ Яко злато в горниле, искуси их/ и, яко
всеплодие жертвенное, прият я./ И во время посещения их
возсияют/ и, яко искры по стеблию, потекут./ Судят языком и
обладают людьми,/ и воцарится Господь в них во веки./
Надеющиися Нань разумеют истину/ и вернии в любви пребудут
Ему,/ яко благодать и милость в преподобных Его/ и посещение
во избранных Его.

Премудрости Соломоновы чтение (глава 4):

Праведник, аще постигнет скончатися, в покои будет./ Старость бо
честна не многолетна,/ ниже в числе лет исчитается./ Седина же
есть мудрость человеком/ и возраст старости житие нескверное./
Благоугоден Богови быв, возлюблен бысть/ и, живой посреде
грешник, преставлен бысть./ Восхищен бысть, да не злоба
изменит разума его/ или лесь прельстит душу его./ Рачение бо
злобы помрачает добрая/ и парение похоти пременяет ум
незлюбив./ Скончався в мале, исполни лета долга,/ угодна бо бе
Господеву душа его,/ сего ради потщася от среды лукавствия./
Людие же видевшие и не разумевше,/ ниже положше в
помышлении таковое./ Яко благодать и милость в преподобных
Его/ и посещение во избранных Его.

На литии стихиры храма.

На стиховне стихиры, глас 5.

Подобен: Радуйся:

Радуйтесь, отцы достоблаженнии,/ Духа Святаго сосуди
избраннии,/ монахов утверждение и священников благолепие,/
благочестия столпи непоколебимии./ Вы бо, дар разсуждения в
подвизе стяжавше,/ тьму прелести присно отгоняете/ и
приходящия к вам с верою и упованием/ на спасения стези
наставляете./ Молите спастися душам нашим.

Стих: Честна пред Господем/ смерть преподобных Его.

Радуйтесь, веры стражи неусыпнии,/ служителие Господни
изряднии,/ монахом наставницы и ангелом собеседницы,/ во
бранех духовных человеком поборницы./ Вы бо молитвою
непрестанною/ миру присно свет подаваете/ и притекающия к
вам с любовию/ душетленных страстей избавляете./ Молите
спастися душам нашим.

Стих: Восхвалятся преподобнии во славе/ и возрадуются на ложах
своих.

Радуйтесь светильницы многосветлии,/ врачеве безмезднии,/
недугующим отрадо и скорбящим утешение,/ обуреваемым
пристанище немятежное./ Вы бо, именем Христовым всяку язю

исцелившие,/ болящим здравие душ и телес подаваете/ и молящихся к вам усердно/ верою и надеждою исполняете./ Молите спастися душам нашим.

Слава, глас 8:

Приидите, празднлюбцы,/ воспоим преподобных отцев Оптинских собор,/ иже, вертоград возделавше духовный,/ добродетели божественныя в нем насадиша./ Темже и, райския сады унаследовавше,/ вечныя славы причастницы явишася,/ но яко дерзновеннии ходатаи ко Господу,/ молитесь неусыпно о чадах ваших:/ да всежеланный плод покаяния принесем Владыце Христу/ и вкусим от древа жизни в Царствии Небеснем.

И ныне, Богородичен, глас тойже.

Тропарь, глас 5:

Православныя веры светильницы,/ монашества неколебимии столпы,/ земли Российския утешителие,/ преподобнии старцы Оптинстии,/ любовь Христову стяжавшии/ и души своя за чада полагавшии,/ молитесь ко Господу,/ да утвердит земное отечество наше/ в православии и благочестии/ и спасет души наша.

На утрени

По 1-м стихословии седален, глас 4:

Приидите, вернии, в песнях духовных преподобных отцев почтим:/ тии бо, во славе Царствия Небеснаго пребывающе,/ за ны молят Всемилостиваго Бога,/ да поставит нас одесную Себе/ в день славнаго и страшнаго пришествия Своего.

Слава, и ныне, Богородичен, глас тойже:

Храм Славы была еси и дверь Света, Пречистая Дево:/ темже обитель Твою, юже славит имя Твое непрестанно,/ от всех бед огради,/ молитвами угодник Твоих, Всецарице.

По 2-м стихословии седален, глас 1:

Днесь церкви русския торжество и отечества нашего веселие,/ се бо обитель Оптинская мощами преподобных, яко златом нетленным, красуется/ и памятию святых своих благоухает./ Темже приступите к ним всяк возраст и всяко сословие, в радости вопиюще:/ слава Прославльшему вас,/ слава Давшему вам благодать,/ слава Подающему вами всем исцеления.

Слава, и ныне, Богородичен, глас тойже:

Пречистый Твой покров простираеши, Владычице Боголюбивая, над отечеством нашим/ и со преподобными отцы непрестанно молиши Рождшагося от Тебе,/ сыновом Российским спастися.

По полиелеи седален, глас 6:

Божественный полк всечестных отцев/ песненными венцы украсим, боголюбцы;/ тии бо, демонов полчища победивше,/ веру православную в человецех утверждают./ Их предстательством, Господи, прими моления наша/ и даруй нам велию милость.

Слава, и ныне, Богородичен, глас тойже:

Владычицу мира в песнях почтим,/ Та бо Спаса и Благодетеля душ наших родила есть./ Темже зовем Пречистей, якоже иногда Гавриил Архистратиг:/ радуйся, Благодатная,/ радуйся,

Благословенная,/ радуйся, Обрадованная, Господь с Тобою.
Степенна, 1-й антифон 4-го гласа. Прокимен, глас 4: Честна пред
Господем/ смерть преподобных Его. Стих: Что воздам Господеву
всех, яже воздаде ми? Всякое дыхание: Евангелие от Матфея,
зачало 43.

По 50-м псалме стихира, глас 6:

Иже на земли ангели/ и на небеси человецы Божии,/ мира благое
украшение/ и отечества нашего утверждение,/ монахов и
преподобных похвалу,/ собор преподобных отцев Оптинских
почтим:/ насаждени бо в дому Господни/ и процветше праведно,/
многия заблудшия на путь спасения наставиша/ в преподобии и
правде.

Канон преподобным отцем, глас 8.

Песнь 1

Ирмос: Колесницегонителя фараоня погрузи,/ чудотворяя
иногда/ Моисейский жезл, крестообразно поразив/ и разделив
море,/ Израиля же беглеца, пешеходца спасе,/ песнь Богови
воспевающа.

Припев: Преподобнии отцы Оптинстии, молитесь Бога о нас.
Како восхвалим вас, преподобнии, добре подвиги совершившыя,/
веру спасительную соблюдшия и Церковь богоугодным житием
возвеселившия?/ Темже молим, подайте нам разум, достойно
воспеть вас.

Кто исповесть болезни и труды многоскорбнаго жития вашего,
отцы преподобнии,/ имиже соделали есте души ваша сосуды
благодати Божия?/ Темже прославляем святую память вашу.
Вземше на рамена своя благое иго Христово,/ усердно
подвизались есте, отцы преблаженнии,/ и, тесным путем
шествующе,/ достигли есте Царствия Небеснаго.

Богородичен: О, Пресвятая Дево, Мати Бога Вышняго,/ прими
моления рабов Твоих, с верою к Тебе прибегающих,/ Ты бо еси
Пристанище необуреваемое православных христиан.

Песнь 3

Ирмос: Утверждей в начале Небеса разумом/ и землю на водах
основавый,/ на камени мя, Христе, заповедей Твоих утверди,/ яко
несть свят, паче Тебе, Едине Человеколюбче.

Радуйся, отче Паисие, Молдовлахийская похвало,/ умнаго
делания наставниче и духовнаго окормления возродителю,/ твои
бо ученицы по всей земли Российской/ монашеское благочестие
преумножиша.

Слезамы многими и скорбным житием/ Феодор, инок Свирский,
на высоту добродетелей возшед,/ преподобнаго Льва любовию
духовне породил,/ имже в Оптине пустыни старчество утвердися.
Основание твердое подвигом положив Христа, яко камень
краеугольный, / был еси первоначальник сонму старцев,
преподобне отче Льве,/ и приял еси благодать духовно окормляти
монахи и люди страждущия.

Богородичен: Бога зряще воплощаема из Тебе, Дево,/ удивишася

горнии силы./ Мы же Тя, яко сущую Богородицу, непрестанно
величаем.

Седален, глас 4:

Житейское море воздержанием непоколеблемо преплывше,/ ко
пристанищу безстрастия и совершенного образа благочестия при-
стали есте,/ богоноснии подвижницы Оптины пустыни,/ и покой
душам вашим обрели есте,/ егоже обеща Христос Бог учеником
Своим.

Слава, и ныне, Богородичен:

Тя, Мати Божия, роди родов поют, славят и Тебе поклоняются,/
избави нас от всяких злых наветов вражиих,/ Твои бо есмы раби,
да не постыдимся.

Песнь 4

Ирмос: Ты моя Крепость, Господи,/ Ты моя и Сила,/ Ты мой Бог,
Ты мое Радование,/ не оставь недра Отча/ и нашу нищету
посетив./ Тем с пророком Аввакумом зову Ти:/ силе Твоей слава,
Человеколюбче.

Блажен еси воистину, преподобне отче Макарие,/ яко насытил еси
благодатным словом и писаньми алчущих души/ и напоил еси
жаждущия правды.

Вся земля Российская позна имя твое, святыи отче Амвросие,/ ты
бо, помощь духовную людем щедро подавая,/ всем вся был еси и
любовию души омраченныя просвещал еси.

Духом Святым наставляемь,/ в Рославльскую пустынь вселился
еси, преподобне отче Моисее,/ отонюду же во обитель Оптинскую
призван быв,/ чадолюбивый отец и мудрый наставник монахом
явился еси.

Богородичен: Един от Святыя Троицы воплотися от Тебе,
Пречистая,/ да спасет весь род человеческий от работы вражия/ и
вечнаго осуждения.

Песнь 5

Ирмос: Вскую мя отринул еси/ от лица Твоего, Свете
Незаходимый,/ и покрыла мя есть чуждая тьма, окаяннаго,/ но
обрати мя и к свету заповедей Твоих/ пути моя направи, молюся.
Благий единоревнитель брату твоему по плоти явился еси,
преподобне отче Антоние,/ ему же в послушании пребывая,/
терпением болезней, скорбей и лютых искушений/ Царствия
Небеснаго достигл еси.

Уклонився от мира и вся, яже в мире оставь, отче Иларионе,/
благий ярем послушания преподобным Льву и Макарию понесл
еси./ Сего ради, многими дарами обогатився,/ искусный
наставник явился еси.

Умом в горняя устремляясь,/ усердный делатель молитвы
Иисусовой был еси, преподобне отче Анатолие,/ тяжкую же
болезнь на земли безропотно претерпев,/ ныне на Небеси в лице
Оптинских святых радуешься.

Богородичен: Все наше упование на Тя возлагаем, Мати Дево,/

призри на ны, люди согрешившия,/ с верою чающия от Тебе заступления и спасения.

Песнь 6

Ирмос: Очисти мя, Спасе,/ многа бо беззакония моя,/ и из глубины зол возведи, молюся,/ к Тебе бо возопих, и услыши мя,/ Боже спасения моего.

Сотаинник святаго Амвросия быв, преподобне отче Иосифе,/ и благодать старчества от него восприем,/ многия люди, паче же сестры обители Шамординския, окормлял еси./ Не остави молитвами твоими и нас, чтущих святую память твою. Славу земную презрев, преподобне отче Варсонофие,/ во обитель Оптину по слову Господню стопы твоя направил еси,/ идеже, премудростию Божиею напитався,/ мудрыя века сего управил еси. Нектар духовный на лугу Оптинстем, яко пчела многотрудная, собрав,/ верным разумно раздавал еси, блаженне Нектарие./ Напоследок же свидетель истинный разорения обители быв,/ о страждущих людех сугубо молился еси.

Богородичен: Владычице Богородице,/ отверзи нам двери милосердия Твоего,/ Ты бо еси спасение рода христианскаго.

Кондак, глас 6:

Печальницы теплии народа Божия,/ преподобнии отцы Оптинстии,/ грешныя в покаянии утвердивше,/ нищия духом обогативше,/ плачущия утешивше,/ алчущия и жаждущия правды насытивше,/ изгнанным за правду Божию душею спострадавше,/ вся ко спасению наставили есте./ Ныне же, во славе небесней пребывающе,/ молитесь непрестанно о душах наших.

Икос:

Днесь светло торжествует пустынь Оптина,/ прославляющи всечестный собор богомудрых отцев,/ иже, древним отцем поревновавше,/ благочестие возлюбивше и многия люди светом евангельским просветивше./ Темже и мы воспоеваем им сице:/ радуйтесь, душевных болезней врачей;/ радуйтесь, недугов телесных целителие./ Радуйтесь, непрестанныя молитвы делателие;/ радуйтесь, о грешницех к Богу ходатаи./ Радуйтесь, старцы богомудрии,/ вы бо во славе небесней пребываете, молящися непрестанно о душах наших.

Песнь 7

Ирмос: Божия снисхождения/ огонь устыдися в Вавилоне иногда./ Сего ради отроцы в печи, радованною ногою,/ яко во цветнице, ликующе, пояху:/ благословен еси, Боже отец наших.

Яко строитель мудрый,/ благолепием обитель украсил еси, преподобне отче Исаакие,/ и словесы простыми кротце братию наставляя, поучал еси пети:/ благословен еси, Боже отец наших. В годину скорбную утешитель людем страждущим явился еси, преподобне отче Анатолие,/ елеем милости сердца ожесточенная умягчая и научая взывати:/ благословен еси, Боже отец наших. Исполнение пророчеств старца Варсонофия/ о грядущих бедах

России узрел еси, преподобне отче Никоне,/ и, со смирением
гонения и болезни претерпев, с упованием зывал еси:/
благословен еси, Боже отец наших.

Богородичен: Прости руже Твоя, Препоблагословенная Дево,/ к
Сыну Твоему, Христу Богу нашему, молящи усердно,/ да помилует
нас, грешных, по велицей Своей милости.

Песнь 8

Ирмос: Седмерицею пещь/ халдейский мучитель/ богочестивым
неистовно разжже,/ силою же лучшею спасены сия виде,/ Творцу
и Избавителю вопияше:/ отроцы, благословите,/ священники,
воспойте,/ людие, превозносите во вся веки.

В смирении претерпел еси вся злострадания, отче
преподобномучениче Исаакие,/ и, крест взял на ramo,
добропобедно житие твое скончал еси/ и тако вшел еси в радость
Господа твоего, воспевая:/ благословите, вся дела Господня,
Господа.

В изгнании и скорбех житие ваше скончавше,/ венцы нетленные
прияли есте, богоноснии отцы Оптинстии, ведомии и неведомии,/ и
ныне в горних обителях прославляете Отца нашего Небеснаго,
зывающе:/ благословите, вся дела Господня, Господа.

Пасху Господню прославляюще, смерть за Христа прияли есте,/ и
иеромонаше Василие, иноцы Трофиме и Ферапонте./ Темже
воистину обеты до конца соблюли есте, зывающе:/ благословите,
вся дела Господня, Господа.

Богородичен: Неусыпаемую в молитвах Заступницу обрете Тя,
Непорочная Дево, человеческий род. Темже радующися, поем:
благословите, вся дела Господня, Господа.

Песнь 9

Ирмос: Ужасеся о сем Небо/ и земли удивишася концы,/ яко Бог
явился человеком плотски/ и чрево Твое бысть пространнейшее
Небес./ Тем Тя, Богородицу,/ Ангелов и человек чиноначалия
величают.

Вознесите, молитвы ваша горе, преподобнии отцы,/ о всех чтущих
святую память вашу,/ да возможем и в скорбных обстояниях
благоугодити Богу/ и наследовати жизнь вечную.

Монахов множества ныне торжествуют,/ ублажающе собор
богоносных отцев, Богом дивно прославленных,/ тех бо
молитвами обитель Оптинская создается/ и Церковь Русская во
благочестии утверждается.

Се отверзошася вам врата небесная, отцы святии,/ скончавшим
добре житие на земли,/ и ныне вкупе со ангельским воинством
зрите славу Божию,/ непрестанно славословяще Триипостасное
Божество.

Богородичен: Родила еси безлетнаго Сына, Пречистая,/ плоть
нашу приемшаго и Кровию Своею на Кресте грехи людския
омывшаго,/ Сего убо моли избавити нас от вечныя смерти.

Светилен:

Светильник ногам вашим закон Божий положивше, отцы преподобнии,/ обители Духа Пресвятаго явистесь и заступницы земли Российския покажутся./ О нас непрестанно молитесь, почитающих верою пречестную память вашу,/ добродетелей мудрии учительи и истиннии наставницы веры.

Слава, и ныне, Богородичен:

Сладосте ангелов, скорбящих Радосте,/ христиан Предстательнице, Дево Мати Господня,/ заступи нас и избави от вечныя муки.

На хвалитех стихиры, глас 6.

Подобен: Все отложше:

Все отложивше о земных попечении/ и страстей мучительство отринувше,/ преподобнии отцы богомудрии,/ просветитесь благодатию,/ и, яко светила возсиявше,/ просвещаете всю подсолнечную/ и молитесь о чтущих святую память вашу. Духовная светила земли нашея,/ на тверди церковней светло возсиявше,/ к тихому пристанищу нас наставляете/ и, от житейских страстей избавляюще,/ кроткими словесы и любовью/ радости духовныя исполняете/ и со дерзновением молитесь о душах наших.

Преподобнии отцы Оптинстии,/ вы истинне лицом к лицу,/ ныне зрите славу Господню/ и райския жизни наслаждаетесь,/ юже уготова Бог всем любящим Его./ И нас сию улучшить сподобите,/ совершающих святую память вашу.

Слава, глас 8:

Приидите, благочестия ревнителие,/ отцы наша духовныя похвалим:/ Леонида, Моисея и Антония,/ Исаакия, Макария и Анатолия,/ с нимиже Илариона и Варсонофия,/ со Иосифом славнаго Амвросия,/ инаго Анатолия и Нектария,/ и преподобномученики Никона и Исаакия./ Старцы великия песньми почтим,/ сице взывающе:/ преподобнии отцы богомудрии,/ не престайте о нас молиться,/ вы бо есте заступницы наши.

И ныне, Богородичен, глас тойже:

Владычице, прими молитвы раб Твоих/ и избави нас/ от всякия нужды и печали.

На Литургии

Блаженны от канона песни 3-я и 6-я. Прокимен, глас 7: Честна пред Господем/ смерть преподобных Его. Стих: Что воздам Господеву о всех, яже воздаде ми? Апостол к Галатам, зачало 213. Аллилуия, глас 6: Блажен муж, бояйся Господа,/ в заповедех Его восхощет зело. Стих: Сильно на земли будет семя его. Евангелие от Луки, зачало 24. Причастен: Радуйтесь, праведнии, о Господе,/ правым подобает похвала.

Молитва

О, божественный сонме, преподобнии отцы, богоноснии старцы и новомученицы Оптинстии, ангельским житием на земли просиявшии и в небеснем граде прославленнии! Вемы, яко во дни

земного служения вашего никтоже тощ и неутешен от вас отыде, вы бо всем вся бысте: сомнящимся утверждение, скорбящим утешение, печальным радование, кающимся прощение, грешником вразумление, болящим исцеление.

Ныне же, пред Престолом Божиим предстояще, воззрите от горния славы и посетите благосердием вашим нас, немощных и беспомощных: заблуждшия възщите, расточенныя соберите, прельщенныя обратите и совоюпите Святей, Соборней и Апостольстей Церкви; иже во иночестем житии подвижающияся оградите от всех навет вражиих, юность вразумите, старость поддержите, супружества в мире и единомыслии соблюдите. Услышите нас, божественнии врачеве, наставите на путь покаяния и научите в заповедех Господних присно ходити, да сподобимся ходатайством вашим Царствия Небеснаго, идеже вкупе с вами прославим Бога, дивнаго во святых Своих, Отца и Сына и Святаго Духа, во веки веков. Аминь.